

SURANA PAUL MOBHAA-BHAANA TO JAMA'A I TESALONIKA

POGAU BHAA-BHAANA

Surana Paul Mobhaa-bhaana To Jama'a i Tesalonika atoburi to apekaogeaka tee apekatangkaaka incana manga mia moparacaeana tee Isa i kota Tesalonika. Tesalonika sii o ibu kotana Poropinsi Makedonia, saangu poropinsi i pamarintana Roma. Jama'a i Tesalonika apakaroa Paul sapadhana abholi kota Filipi. Kera-kera i tao 51 M, Paul, Silas tee uka Timotius apakawaaka Lele Malape i kota Tesalonika. Iwe sumai abhari o mia momembalina moparacaeana tee Isa, maka dhaangia tee karobho wakutuuna Paul tee Silas atoraeka abhali pamarintana Kaisar. Miana Yahudi apogau, "Bhari-bharia manga incia aewangi manga katotapuna Kaisar tee apogau ande dhaangia samia raja mosagaanana, siitumo Isa Al Masi." (Kamata Tul. 17:1-9) Wakutuuna o kajadia incia sumai, manga miana Yahudi mogigibuluna tee Paul apepuumo abhali usahana Paul to apakoleleaka kaadharina Karasiteni to manga mia inda motolentuna miana Yahudi, siitumo i manga mia mopakamataakana kapeeluna tee agama Yahudi. Sabutuna o Paul tee Silas saidhepo

amate tee tabeana apalaiaka karon a minaaka i Tesalonika kasiimpo alingka i kota Berea.

Sapadhana incia sumai, Paul ameri ancosala o mia moparacaeana tee Isa i Tesalonika bheamurutadi roonamo o kanarakaa inamisina manga incia, jadi incia alamboko Timotius to apekaoge incana manga incia. Kasiimpo sakawana i kota Korintus, Paul atarima sura minaaka i sabhangkana siitumo Timotius to so'alina kadhaangiana jama'a i Tesalonika. I nuncana sura incia sumai dhaangia o lele iundeakana incana Paul, siitumo mia moparacaeana tee Isa i Tesalonika sadhaadhaa ata'ati i nuncana iimanina, sabutuna o Paul aburi sura pendua to manga incia roonamo amasanaa mpuu incana tee abangga tee manga incia.

Jadi, i nuncana sura incia sii, Paul asuku-ruaka lele itarimana pokaiana tee iimani tee kaasina manga incia, tee audhaniakea pokaiana tee dhadhina karon a wakutuuna incia dhaangiapo i tanga-tangana manga incia. Sapadhana apogauaka bhari-bharia giu incia sumai, Paul alawani bhari-bharia kaabhakina manga incia pokaiana tee umbaana pendua o Al Masi. Manga incia aabha, "Ande dhaangia o miana Karasiteni amate i wakutuuna o Al Masi indapo aumba pendua, amembali buaka o mia incia sumai atarima dhadhi mobakaa sa'umurua minaaka i Al Masi?" Paul apajelasiakea manga mia moparacaeana tee Al Masi bheapadhadhia pendua moomini amatemo. Manga miana Tesalonika uka aabha, "Naepia o Al Masi bheaumba pendua?" Paul apajelasiakea ande o Isa bheaumba sakijamata

tee i wakutuu inda imatau. Rampaakanamo sumai, incia audhaniaka jama'ana Tesalonika to adhadhi mangkilo mamudhaakana inda amaea wakutuuna apokawa tee Isa. I saangua sura incia sii, Paul apekaoge incana jama'ana Tesalonika mamudhaakana inda aunto-unto tee atorotorosu apewau malape!

Antona

Porikanaana pogau 1:1

Kasukuru tee kapujia 1:2--3:13

Naasehati pokaiana tuaapa tabeana o pem-
ingkuina mia moparacaeana tee Isa 4:1-12

Kaadhari pokaiana tee umbaana pendua Al
Masi 4:13--5:11

Naasehati kapadhaa 5:12-22

Katutubhi 5:23-28

Salamu

1:1

¹ Minaaka i Paul, Silwanus,* tee Timotius.

To jama'a i Tesalonika momembalina uumatina Aulata'ala o Amata i nuncana sarona Isa Al Masi Oputa Momalanga. Rahumati tee dhadhi malape apoose tee ingkomiu.

Hasilina Kaadhari Ipakoleleakana Paul

1:2-10

² Ingkami sadia tasukuru i Aulata'ala rampaakanamo ingkomiu, tee ingkami inda taunto-
unto tasarongi saromiu i nuncana do'amami.

1:1 1:1 Tul. 17:1.

* 1:1 1:1 *Silwanus*: Kagoraakana "Silas" i nuncana pogau Yunani; kananeana sabhangkana Paul sii atogoraaka Silas i nuncana Tulatulana Manga Rasulu tee sura mosagaanana minaaka i Paul.

³ Ingkami taudhania torotorosu tuaapa o pemingkuimiu apokana tee iimanimiu i wakutuuna ingkami tado'a i aroana Aulata'ala o Amata. Ingkami taudhania uka o usahamiu apokana tee kaasimiu, tee o kapoolimiu to utarai kanarakaa rampaakana opea iharapumiu tee Isa Al Masi Oputa Momalanga.

⁴ E manga witinai imaasiakana Aulata'ala, ingkami tamataua ande o Aulata'ala padhamo aplikomiu,

⁵ roonamo Lele Malape ipakoleleakamami sumai atopakawaaka to ingkomiu mencuana tangkanamo soo pogaumea, maka tee kuasa tee Rohina Aulata'ala tee kayaakini mompuu-mpuu. Ingkomiu umataua tuaapa ingkami tadhadhi to kalapemiu wakutuuna tadhaangia i tangatangamiu.

⁶ Sumaimo ingkomiu uose pemingkuimami tee uose pemingkuina Oputa Momalanga. Moomini unamisi abhari o kanarakaa, ingkomiu utarima firmani incia sumai tee inca mokaunde-unde moumbana minaaka i Rohina Aulata'ala,

⁷ sabutuna ingkomiu umembali sandarana karo to bhari-bharia mia moparacaeana tee Isa modhaangiana i Poropinsi Makedonia tee i Poropinsi Akhaya.

⁸ Roonamo minaaka i ingkomiu o firmanina Kawasana Opu sumai atoresa mencuana tangkanamo soo i Makedonia tee i Akhaya, maka i bhari-bharia tampa uka o lenea kaparacaeamiu tee Aulata'ala sumai atoresamo. Sumaimo ingkami indamo tafaraluu tapogauaka opeopea

uka,

⁹ roonamo karonā manga incia mopetulatu-laakana tuaapa ingkomiū umangatarima waku-tuuna taumba tapokawaakakomiū i piamo itu, tee tuaapa ingkomiū ubholi barahalamiū tee umbuli uose Aulata'ala modhadhi tee mobanara sumai to ulaiania.

¹⁰ Manga incia uka apogauaka tuaapa ingkomiū uharapuaka umbaana Anana Aulata'ala minaaka i sorogaa, siitumo Isa Al Masi, mopadhana ipadhadhina Aulata'ala pendua minaaka i mate, tee Incia bheamangapasalaamati minaaka i pamuruna Aulata'ala bhemoumbana naile itu.

2

Karajaana Paul i Tesalonika

2:1-12

¹ E manga witinai! Ingkomiū umataua ande o umbaamami i tanga-tangamiū inda asia-sia.

² Ingkomiū umataua wakutuuna ingkami indapo takawakomiū i Tesalonika, ingkami mangasikisaa tee mangapekaea i kota Filipi. Tee moomini abhari o mia mangabhalina maka o Aulata'ala padhamo mangapabarani to tapakoleleakakomiū Lele Malape mominaakana i Aulata'ala.

³ Sumaimo ingkami takembakomiū mamudhaakana uparacaea tee Lele Malape, tee ingkami inda tee haejatimami momadhaki to tatipukomiū.

⁴ Maka roonamo Aulata'ala mangaabhi ta-laenga mangadhawuaka tugasina to tapakole-leaka Lele Malape. Sumaimo ingkami tabarani tapakawaaka kasamea incia sii, mencuana to tapasanaa ngangarandana mia, maka mamudhaakana tapasanaa ngangarandana Aulata'ala moujina ngangarandata.

⁵ Ingkami inda tabhoasaka pogau momameko tee o haejatimami inda amaso'o, tee o giu incia sumai umataua ande o Aulata'ala satotuuna o sakusiimami.

⁶ Tee inda ta'usaha to tapeelo kapujia minaaka incemapo uka, malape minaaka i ingkomiu atawa o mia mosagaanana, moomini ingkami o rasuluna Al Masi tee takohaku to taemani opeapo uka minaaka i ingkomiu.

⁷ Maka amalulu o pemingkuimami wakutuuna tadhaangia i tanga-tangamiu mboomo samia bhawine mopaduduna tee modhambaakana anana karona.

⁸ Rampaaakana tamaasiakakomiu mpuu, ingkami inda soo tadhawuakakomiu Lele Malape mominaakana i Aulata'ala, maka tadhawuakakomiu uka o dhadhimami roonamo kaasimami tee ingkomiu.

⁹ E manga witinai, atantumo ingkomiu dhaangiapo uudhania tuaapa o kangulemami takarajaa eo tee malo to opea ifaraluuna dhadhimami mamudhaakana ingkami inda tapanarakaakomiu. Mboomo sumai ingkami tapakawaakakomiu Lele Malape mominaakana i Aulata'ala sumai.

¹⁰ Ingkomiu tee Aulata'ala momembalina sakusii, ande ingkami tadhadhi mangkilo,

tabanara tee inda tee kasalahamami tee ingkomiu moparacaeana tee Al Masi.

¹¹ Ingkomiu umataua tuaapa tanaase-hatikomiu, apokana mboomo samia ama tee anana karona,

¹² ngangarandamiu samia-samia tapekatangkea tee tahiburukomiu, tee ingkami taemani mpuu mamudhaakana o pemingkuimiu apokana tee kapeeluana Aulata'ala mopadhana mokembakomiu to upesua i nuncana pamarintana tee kamuliangina.

Kaunde-unde to Jama'a

2:13-20

¹³ Rampaakanamo sumai ingkami inda taunto-unto taemani sukuru i Aulata'ala, roonamo ingkomiu padhamo utarima firimanina Aulata'ala mopadhana ipakoleleakamami sumai, tee uperangoia tee utarimaia o lele incia sumai mencuana mboomo saangu lele mominaakana i maanusia, maka o lele sumai uperangoia tee utarimaia atotuu-totuu roonamo aminaaka i Aulata'ala. Firimanimu incia sumai mokarajaana i nuncana karomiu moparacaeana tee Al Masi.

¹⁴ E manga witinai, ingkomiu uosemo sandarana karona bhari-bharia jama'ana Aulata'ala i Yudea momembalina pewauana Isa Al Masi, siitumo kanarakaa inamisimiu aumba minaaka i mia mominaakana i lipumiu karomiu, apokana mboomo inamisina manga jama'ana Aulata'ala i Yudea sumai aminaaka i manga miana Yahudi uka,

¹⁵ tee manga incia sumai mopadhana mopeka-matena Isa Oputa Momalanga tee manga nabii, kasiimpo asikisaa tee mangapadhencu minaaka i Yudea. Manga incia inda apewau ipeeluna Aulata'ala tee amusuhi bhari-bharia mia,

¹⁶ tee mangajoli-joli to tapakoleleaka firimanina Aulata'ala i manga lipu inda motolentuna miana Yahudi mamudhaakana manga lipu mosagaanana sumai inda atosalaamati *alaloi Lele Malape*. Tee mboo sumai manga mi-ana Yahudi padhamo apajulu torosu dosana sakawana i batasina *kasabarana Aulata'ala*, sabutuna Incia apalimba pamuruna to manga incia.

¹⁷ E manga witinaiku, inciamo o pogaata mosabantarana sumai mangapamembali tapo-maridho, maka ingkita taposaangu ngangaranda, tee gaumami mpuu tapokawa pendua tee ingkomiu roonamo tapemeliliakakomiu!

¹⁸ Rampaakanamo ingkami taneati to talingka tasolokomiu, hususuna iaku o Paul, padhamo ku'usaha pia mpearo, maka ingkami sadia mangajoli Ibilisi.

¹⁹ E manga witinai, bholi umente ande ingkami tapemeliliakakomiu, sabutuna ingkami gaumami tasolokomiu. Ingkomiumo mangapaunde-undena tee momembalina mahakotamami i aroana Isa Oputa Momalanga wakutuuna umbaana naile itu.

²⁰ Ingkomiumo momembalina kamuliangi-mami tee mangapaunde-undena.

3

Lele Malape Ibhawana Timotius

3:1-13

¹ Rampaakanamo sumai o pemelilimami indamo tatarai, sumaimo ingkami tafikiria salabhina tamboore samia-miamami i kota Atena,

² sumaimo tatumpu Timotius witinaita sa'iimani tee mopobhawa-bhawana mokarajaana tee ingkita i nuncana tapakawaaka Lele Malapena Al Masi, mamudhaakana apekatangka tee apekaoge incamiu i nuncana iimanimiu,

³ mamudhaakana i tanga-tangamiu bholi dhaangia o mia inda momatangkana iimanina roonamo kanarakaa incia sii, tee ingkomiu karomiu umataua ande manga kanarakaa incia sii o haejatina Aulata'ala to ingkita.

⁴ Inciamo, wakutuuna ingkami tapobhawa tee ingkomiu, padhamo tapumbaakakomiu porikana ande ingkita bhetanamisi kanarakaa. Garaaka o giu incia sumai unamisimea mboomo imataumiu sii-sii.

⁵ Sarangoku lelemiu, iaku indamo kusabara, sabutuna kulambokomo Timotius to aumbaaka i Tesalonika to amatauaaka kadhaangiamiu ara dhaangiapo utorotorosu uparacaea tee Al Masi, roonamo kumeri ancosala tee cara tuaapapo uka o *Ibilisi* pande pekawuju sumai apadhamo awujukomiu, sabutuna asia-siamo bhari-bharia kanguleamami.

⁶ Maka sii-sii, Timotius ambulimo minaaka i tampamiu tee padhamo apokawa tee ingkami.

Incia mangapakawaaka lele ikaunde-undeaka pokaiana tee iimani tee kaasimiu, tee apetulat-ulaaka ande ingkomiu sadia mangaudhani tee mangapemeliliaka mpuu tee gaumiu upokawa tee ingkami, mboomo ingkami uka gaumami tapokawa tee ingkomiu.

⁷ E manga witinai, rampaakanamo sumai, i tanga-tangana sagala giuna kanarakaa tee kasukaramami, ingkami tatohiburu roonamo ingkomiu tee iimanimiu.

⁸ Sabutuna sii-sii o namisimami mboomo tadhahi pendua, somanamo ingkomiu umatangka ukakaro tee uposaangu tee Kawasana Opu.

⁹ Ingkami tabeana tapewau opea to tasuku-ruaka i Aulata'ala to bhari-bharia kasanaa ipotibhaakamami minaaka i Aulata'ala rampaakanamo ingkomiu?

¹⁰ Eo tee malo ingkami tampuu-mpuu tado'a mamudhakaana ingkami amembali tapokawa tee ingkomiu tee mamudhakaana ingkami tamembali tapamondo bhari-bharia kakuranga i nuncana iimanimiu.

¹¹ Maasangia Aulata'ala Amata tee Isa Oputa Momalanga mangabungkaleaka dhala mamudhaakana o haejatimami to tapokawa tee ingkomiu atobungkale.

¹² Maasangia o Kawasana Opu apamembalikomiu uhandu upomaamaasiaka podhohopodho ingkomiu tee uhandu umaasiaka mia mosagaanana, apokana mboomo kaasimami tee ingkomiu.

¹³ Tee mboo sumai, Kawasana Opu bheapekatangka incamiu, sabutuna ingkomiu

umangkilo tee inda dhaangia ibalaciakamiu i aroana Aulata'ala o Amata, i wakutuuna Isa Oputa Momalanga aumba apobhawa-bhawa tee bhari-bharia mia mosaalihi.*

4

Naasehati mamudhaakana Tadhadhi Mangkilo

4:1-12

¹ E manga witinaiku, aahirina ingkami taemani tee tanaasehatiakakomiu i nuncana sarona Isa Oputa Momalanga mboomo mopadhana ipengkaadhariakamiu tuaapa o carana tabeana udhadhi mamudhaakana umembali upasanaa incana Aulata'ala. Maka sii-sii tee kuasana Isa Oputa Momalanga ingkami tajungkurikomiu mamudhaakana uhanda mpuu upewau giu incia sumai,

² roonamo umataua o kasamea mopadhana idhawuakamami to ingkomiu minaaka i Isa Oputa Momalanga.

³ Giumo incia sii o kapeeluana Aulata'ala: Dhadhi mangkilomo, siitumo upekaridhoa o karomiu minaaka i pewau pebula,

⁴ mamudhaakana bhari-bharikomiu umataua tuaapa o carana ukuasai karomiu,* tee mboo

* **3:13 3:13** *mia mosaalihi:* Atawa "bhari-bharia malaa'ekatina."

* **4:4 4:4** *ukuasai karomiu:* Pogau mokoma'anana 'karo' amembali uka akoma'ana 'bhawinena,' sabutuna aeati incia sii amembali atoma'anai, "Aulata'ala gauna uka samia-samia umane mokobhawine tabeana amataua tuaapa adhadhi aposaangu tee bhawinena tee cara momangkilo tee motohoromati i aroana bhari-bharia mia."

sumai ingkomi u dhadhi mangkilo tee ahoro-matikomi maanusia rangamiu,

⁵ bholi uose nawusumi, mboomo manga mia inda momatauna Aulata'ala.

⁶ I nuncana giu incia sii, bholi dhaangia mopekarugina tee mo'akalaina witinaina sa'iimani. Ma'anana ancotala dhaangia mopewauna zinaa tee bhawinena witinaina mosa'iimani. Minaaka i piamo itu ingkami padhamo taudhaniakakomi, ande o Kawasana Opu dhaanamo bheahukumu manga mia mopewauna kasalaha mboo sumai.

⁷ Aulata'ala mangakemba mencuana to tapewau manga giu marombu, maka to tapewauaka giu mangkilo.

⁸ Rampaakanamo sumai, ande dhaangia o mia momendeuna kaadhari incia sii, sumaimo mencuana amendeu aose maanusia, maka amendeu aose Aulata'ala mopadhana modhawuakakomi Rohina Momangkilo.

⁹ Ingkami indamo afaraluu to taburiakakomi carana tuaapa umaasiaka manga witinaimiu sa'iimani, roonamo carana upomaamaasiaka podho-podho ingkomi padhamo upengkaadhariakea minaaka i Aulata'ala.

¹⁰ E manga witinai, giu incia sumai padhamo upewaua to bhari-bharia witinaita sa'iimani i Makedonia, maka ingkami taudhaniakakomi mpuu mamudhaakana uhandu upomaamaasiaka.

¹¹ Giu molaengana to ropeamiu satotuuna udhadhi utanangi tee inda u'urusu masa'alana mia mosagaanana, tee upeelomo karajaa to upad-

hadhiaka karomiu, mboomo mopadhana iparin-taakamami to ingkomiu i piamo itu.

¹² Tee udhadhi mboo sumai, ingkomiu inda up-osaronaka i incemapo uka, tee manga mia inda moparacaeana tee Al Masi bheahoromatikomiu.

Umbaana Kawasana Opu

4:13-18

¹³ E manga witinai, ingkami gaumami umataua o kadhaangiana mia mate, mamudhaakana inda amapii incamiu mboomo mia inda tee iharapuna.

¹⁴ Ingkita taparacaea ande o Isa amatemo tee adhadhimo pendua. Rampakaanamo sumai ingkita uka taparacaea ande o Aulata'ala bheapadhadhi pendua bhari-bharia mia moparacaeana tee Al Masi tee bheadhadhi apobhawa tee Isa.

¹⁵ Pogau ibhoasakamami to ingkomiu sii alaloi firimanina Kawasana Opu, siitumo: Wakutu-una umbaana Isa Al Masi, ingkita modhadhina sii inda bhetaporikanaaka manga mia morikanana momate.

¹⁶ Naile itu o Isa Oputa Momalanga bheasapo minaaka i sorogaa apoose adhawuaka parinta tee suara momakaa, apoose tee suarana kapalana malaa'ekati tee uka onina sangkakalana Aulata'ala. Manga mia mate moposaanguna tee Al Masi siitumo bhemobhaa-bhaana bheipadhadhi pendua,

¹⁷ kasiimpo o bhilaana manga mia modhadhina i wakutuu incia sumai bheapobhawa-bhawa atoangka i bhawona ta'ina ngalu tee manga mia moparacaeana tee Al

Masi mopadhana ipadhadhi pendua minaaka i mate to apokawa tee Kawasana Opu i laiana. Mboomo sumai ingkita bhetapobhawa-bhawa tee Kawasana Opu sa'umurua.

¹⁸ Rampaakanamo sumai, ingkomiu tabeana upopekaoge inca podho-podho ingkomiu tee bhoasaka incia sii.

5

Kojagamo to Umbaana Kawasana Opu

5:1-11

¹ E manga witinaiku, maka to wakutuuna tee naepia o kajadia incia sumai, indamo afaraluu kuburiakakomiu.

² Roonamo ingkomiu umataua totuu ande o eona umbaana Kawasana Opu bheaumba mboomo samia mia manako i wakutuuna pontanga malo.

³ Wakutuuna dhaangia manga mia mopogauna, "Bhari-bharia kadhaangiata atanangi tee a'amani," garaaka i wakutuumo incia sumai manga incia uka bheabinasa sakijamata, apokana mboomo kapii mokakawaa inamisina bhawine bhemopalaahirina anana, tee inda dhaangia samia uka o mia momembalina mopalaiakana karona.

⁴ E manga witinai, ingkomiu mencuana mia modhadhina i nuncana kalalanda, sabutuna o eo incia sumai inda bheapatokidhakomiu mboomo mia ipesuaikina mia manako,

⁵ roonamo bhari-bharikomiu o anana kainawa tee anana eo. Ingkita mencuana miana malo atawa o miana kalalanda,

⁶ rampaakanamo sumai, bholi takole mboomo manga mia inda mosadara, maka tabeana takojaga tee amainawa o fikirita.

⁷ Roonamo mia mokole, akole i wakutuuna malo, tee o mia mosumpu apoose amalango i wakutuuna malo uka.

⁸ Maka ingkita sii, tatolentu manga miana kainawa, sumaimo ingkita tabeana takuasai karota. Ingkita tapobhali tee Ibilisi sabutuna tapake katangkesina iimani tee kaasi, tee tapake topi ase mominaakana i kaharapu tee kasalaamati.

⁹ Roonamo Aulata'ala mangapili mencuana to tatarima kahukumuna pamuruna, maka to tatarimaaka kasalaamati alaloi Isa Al Masi Oputa Momalanga.

¹⁰ Incia amate to ingkita mamudhaakana wakutuuna umbaana naile itu, malape dhaangiapo takojaga atawa dhaangiapo takole, ingkita tadhadhi tapoose tee Incia.

¹¹ Rampaakanamo sumai, upopekaoge inca tee upopekatangkamo podho-podho ingkomiu mboomo motangasaana ipewaumiu sii-sii.

Manga Naasehati

5:12-22

¹² E manga witinai, ingkami taemani mpuu mamudhaakana uhoromati manga mia momanguleakakomiu modhaangiana i tangatangamiu, siitumo manga mia mopadhana

ipilina Kawasana Opu to mokapalaikomiu tee monaasehatikomiu.

¹³ Horomatia mpuu manga incia tee kaasi i nuncana ngangarandamiu roonamo opea mopadhana ikarajaana manga incia. Sadiamo udhadhi upomalape podho-podho ingkomiu.

¹⁴ E manga witinai, ingkami taemani uka mamudhaakana unaasehati manga mia mangare, upekaoge incana manga mia momatena akalana, utulungi manga mia momalute, tee usabara tee bhari-bharia mia.

¹⁵ Udhania pekalape, bholi dhaangia o mia mobalasina kadhaki tee giu madhaki, maka sadia u'usahaakea to upewau giu malape podho-podho ingkomiu tee bhari-bharia mia.

¹⁶ Sadiamo ukaunde-unde,

¹⁷ tee bholi umabhotu udo'a.

¹⁸ I nuncana kadhaangia opeapo uka ingkomiu tabeana sadia usukuru, roonamo giumo incia sumai ipeeluna Aulata'ala i nuncana sarona Isa Al Masi to ingkomiu.

¹⁹ Bholi ujoli-joli karajaana Rohina Aulata'ala,

²⁰ tee bholi upanda'ente opea mopadhana ipakawaakana manga nabii.

²¹ Giu opeapo uka tabeana aporikanapo atouji, tee tabeana momalapena ioseta.

²² Pekaridhoa o karomiu minaaka i sagala giuna kadhaki.

Salamu

5:23-28

²³ Maasangia o Aulata'ala momangadhawuakana dhadhi malape, apamembalikomiu o mia mototuu-totuuna modhadhina momangkilo

to Aulata'ala. Maasangia saangua karomiu ajagania Aulata'ala: rohimiu, inyawamiu, tee badamiu, sabutuna inda tee kabalacina wakutuuna Isa Al Masi Oputa Momalanga aumba pendua.

²⁴ Aulata'ala mokembakomiu sumai amembali atoparacaea, tee Incia atantumo bheapewaua o giu incia sumai.

²⁵ E manga witinai, mangado'aaka!

²⁶ Pakawaakamea o salamumami momangkilo to bhari-bharia witinaita.

²⁷ Tee saroni Kawasana Opu, iaku uka kuposamea tee mpuu-mpuu mamudhaakana o sura incia sii ubacaakea to bhari-bharia witinaita sa'iimani.

²⁸ Maasangia rahumatina Isa Al Masi Oputa Momalanga apoose tee ingkomiu.

Kitabi Momangkilona Wolio

Wolio: Kitabi Momangkilona Wolio (New Testament+)

copyright © 2024 Wycliffe Bible Translators, Inc.

Language: (Wolio)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 26 Jul 2025 from source files dated 10 Jul 2025

7df9af1f-1c49-59d2-a164-bde0a20127b3